

आकाशवाणी जयपुर-अजमेर
प्रादेशिक समाचार
दिनांक 27.07.2025 समय: 18.45 बजे

- प्रधानमंत्री नरेन्द्र मोदी कह्यो— 21वीं सदी रा भारत मांय विज्ञान, नुवी ऊर्जा रे साथे प्रगति कर रियो हैं
- मन की बात कार्यक्रम मांय प्रधानमंत्री लोगां ऊं देश मांय बण्या उत्पादा ने खरीदण अर बेचण री अरज करीं
- 76वो राज्य थर रो वन महोत्सव जयपुर मांय व्ह्यो— मुख्यमंत्री भजन लाल शर्मा लोगां ऊं एक पेड़ माँ के नाम लगावण री अरज करीं
- प्रदेश मांय न्यारी-न्यारी ठौड़ां बिरखा रो दौर चाले— भारी बिरखा सारू चेतावण ने देखता कुछ ज़िला रा स्कूलां मांय आवता दो दिन छुट्टी ऐलाण

000

प्रधानमंत्री नरेन्द्र मोदी कह्यो के 21वीं सदी रा भारत मांय विज्ञान नुवी उर्जा रे साथे आगे बध रह्यो हैं आज आकाशवाणी ऊं मन की बात कार्यक्रम मांय, वणा कह्यो के अंतरिक्ष ऊं शुभांशु शुक्ला री सुरक्षित वापसी ऊं देश मान ऊं भरीज ग्यो हैं प्रधानमंत्री कह्यो के टाबरा मांय नवाचार ने बधावो देवण सारू सरू करी ज्या इन्सपायर-मानक अभियान रे तैत हर स्कूल ऊं पांच टाबर चुण्या जावे है अर हर बाळक एक नुवो आईडियो ले र आवे हैं श्री मोदी खुशी जतायी के अजै ताई लाखो बाळक ई अभियान ऊं जुड़ चुक्या हैं

.....
प्रधानमंत्री खुशी जतावता कह्यो के यूनेस्को भारत रा 12 किलां ने विश्व धरोहर ठौड़ ऐलाण कर्या हैं आ मांय 11 किला महाराष्ट्र मांय है अर एक 1 तमिलनाडु मांय हैं वणा राजस्थान मांय किलां रो ई जिक्रो कर्यों

.....
श्री मोदी वोकल फॉर लोकल री बात करता कह्यो के साल 2047 रा विकसित भारत रो रस्तो आत्म-निर्भरता ऊं व्हे र निकळे है अर आत्मनिर्भर भारत री नींव जदे मज़बूत व्हेला जदे आपा वे ही खरीदा अर बेचा जिण ने आपा खुद बणा रिया हां वणा कह्यो के प्राचीन पांडुलिपियां मांय विज्ञान, चिकित्सा-पद्धति, संगीत अर दर्शन रा बारा मांय जाणकारियां हैं इण अनूठा ज्ञान अर विरासत ने सहेजणो हर रहवासी री जिम्मेदारी हैं प्रधानमंत्री कह्यो के इण ऊं प्रेरणा ले र इण साल बजट मांय ज्ञान भारतम् मिशन रो ऐलाण करी ज्यो हैं

.....
प्रधानमंत्री खुशी जतावता कह्यो के भारत अमरीका मांय व्ह्या विश्व पुलिस अर फायर गैम्स मांय कोई छह सौ तमगा जीत ने इतिहास रच्यो हैं श्री मोदी कह्यो के लारला दिनां केई नौजवान एथलीटां अर वां रा मात-पिता ऊं मिल्या संदेशां मांय खेलो भारत नीति री घणी सराहवणा करी ज्यी हैं प्रधानमंत्री कह्यो के स्वच्छ भारत मिशन अबै एक जन आंदोलन बण ग्यो हैं ई साल स्वच्छ सर्वेक्षण मांय साढ़े चार हजार ऊं बत्ती शहर अर कस्बां जुड़्यां हैं श्री मोदी हरियाळी तीज रे साथै ई आवण वाळा पिरवारां री देशवासियां ने शुभकामनावां दी हैं प्रदेश मांय ई मन की बात कार्यक्रम ने ले र लोगां मांय घणो उमाव निजर आयो मुख्यमंत्री भजन लाल शर्मा आप रा रहवास माथे मन की बात कार्यक्रम ने सुण्यां भाजपा प्रदेश अध्यक्ष मदन राठौड़ घुमन्तू जाति समूह रे साथै प्रधानमंत्री रा कार्यक्रम ने सुण्यां

000

राज्यपाल हरिभाऊ बागडे कह्यो है के लोकतंत्र री जीवित राखण मांय लोकतंत्र सेनानियां रो खास योगदान रियो हैं वे आज झुंझुनूं मांय बृज स्मृति प्रन्यास कानी ऊं व्ह्या 'माधव सेवा सम्मान-2025' जळसा मांय लोकतंत्र सेनानियां ने सनमानित कर रिया हां वणा कह्यो के झुंझुनूं जिला री धरती वीरां अर शहीदां री धरती हैं अठे हर गांव मांय वीर अर शहीद मिलेला, जिण देश सारू आप रा प्राण निछावर करण मांय संकोच नी कर्यो वणा देश री सेनावां मांय झुंझुनूं जिला रा नौजवानां रा योगदान री ई सरावणा करीं श्री बागडे कार्यक्रम रे पछे पौधारोपण ई कर्यो कार्यक्रम मांय सामाजिक न्याय अर अधिकारिता मंत्री अविनाश गहलोत अर पैली रा सांसद डॉ. महेश चन्द शर्मा समेत केई मानेता लोग मौजूद रह्यां

000

पैली रा राष्ट्रपति अर नामी वैज्ञानिक डॉक्टर ए.पी.जे. अब्दुल कलाम री पुण्यतिथि माथे आज वां ने सिरधा रे साथै याद कर्या जावें वां ने 'मिसाइल मैन रा तौर माथे ई जाण्या जावें प्रधानमंत्री नरेन्द्र मोदी सोशल मीडिया पोस्ट मांय कह्यो के डॉ. कलाम अनूठा वैज्ञानिक, प्रेरक व्यक्तित्व अर महान देशभक्त हां मुख्यमंत्री भजन लाल शर्मा डॉ. कलाम ने सिरधाजली दीं ई मौके जयपुर मांय भारतीय जनता पार्टी अल्पसंख्यक मोर्चा कानी ऊं विचार संगोष्ठी व्ही संगोष्ठी मांय भाजपा प्रदेश अध्यक्ष मदन राठौड़ भेळा व्ह्यां ई दौरान बोलण वाळा राष्ट्र निर्माण मांय श्री कलाम रा योगदान री सराहवणा करीं सवाईमाधोपुर मांय ई श्री कलाम री पुण्यतिथि मौके सिरधाजली सभावां व्हीं

000

76 वों राज्य थर रो वन महोत्सव आज जयपुर मांय जगद्गुरु रामानंदाचार्य राजस्थान संस्कृत विश्वविद्यालय मांय व्ह्यो मुख्यमंत्री भजन लाल शर्मा इण मांय सिरकत करीं वणा ई मौके विश्वविद्यालय परिसर मांय हरियाळो राजस्थान अभियान रे तैत सिंदूर रो पौधो लगायो अर ड्रोन री मार्फत बीजा रोप्यां ई मौके श्री शर्मा ने प्रदेश ने खुशहाल बणावण सारू सगळा ऊं एक पेड़ मां के नाम जरूर लगावण री अरज करीं

.....

मुख्यमंत्री महोत्सव मांय वन्यजीव संरक्षण अर हिफाजत सारू ठावां काम करण वाळां ने "अमृता देवी विश्नोई स्मृति पुरस्कार दे र सम्मानित कर्यां इण रे पछे श्री शर्मा सीकर जिला रा मण्डावरा गांव मांय वृक्षा रोपण कार्यक्रम मांय भेळा व्ह्यां कार्यक्रम मांय बोलता वन मंत्री संजय शर्मा बतायो के राज्य मांय ई साल दस करोड़ पौधा लगावण रो लगस राख्यी ज्यो है जिण मांय ऊं अजै ताई साढे पांच करोड़ पौधा लगाया जा चुक्या हैं

.....

हरियाळो राजस्थान अभियान रे तैत राज्य रा न्यारा-न्यारा जिला मांय ई प्रभारी मंत्रियां पौध रोपण कार्यक्रमां मांय हिस्सो लियो कोटपूतली-बहरोड़ जिला रा नीमराणा मांय केन्द्रीय वन अर पर्यावरण मंत्री भूपेन्द्र यादव वन महोत्सव मांय सिरकत करीं वणा पढेसरा ऊं बतळ करता पर्यावरण संरक्षण री जरूरत माथे जोर दियो अजमेर मांय विधानसभा अध्यक्ष वासुदेव देवनानी जिला थर रा वृक्षारोपण कार्यक्रम री सरुआत करीं

000

प्रदेश मांय न्यारी-न्यारी ठौड़ां आज ई बिरखा रा दौर चालतो रियो पाली जिला मांय केई ठौड़ां जोरदार बिरखा व्ही धौलपुर जिला मांय व्हे री बिरखा ऊं सरमथुरा रा आंगई बंधा मांय पाणी री तेज आवक व्हे री हैं बंधा रा 6 गेट खोल ने पाणी री निकासी करी जाय री हैं सिरोही जिला मांय मार्डंटआबू समेत न्यारी-न्यारी ठौड़ां तेज बिरखा व्ही बांसवाड़ा जिला मांय भारी बिरखा सारू चेताया जावण ने देखता जिला प्रशासन काले अर परसु दो दिन आंगनबाड़ी केन्द्रा अर कक्षा 1 ऊं 12 वीं ताई रा सरकारी अर गैर सरकारी स्कूलां मांय छुट्टी ऐलाण करी हैं बांरा अर भीलवाड़ा अर डूंगरपुर जिला मांय ई भारी बिरखा ने देखता आवता दो दिन स्कूला मांय छुट्टी ऐलाण करी ज्यी हैं मौसम मेहकमां काले भरतपुर, कोटा अर उदयपुर संभाग मांय कटेई-कटेई भारी बिरखा होवण रो अंदाजो जतायो हैं मेहकमा मुजब जयपुर, अजमेर अर जोधपुर संभाग मांय कटेई-कटेई भारी बिरखा व्हे सकें

मौसम मेहकमों लोगां ने बिरखा री बगत पाणी भराव हलकां मांय बिजळी रा खम्भां ऊं दूरी बणा र राखण अर सावचेती ऊं वाहन चलावण सारु सुझाया हैं

000

आस्था अर उमाव रो तिवार हरियाळी तीज आज रित मुजब मनायो जावें इण ने सावणी तीज ई कही जावें ई दिन महिलावां शिव-पार्वती रो पूजन कर ने सुख-समृद्धि री कामना करे हैं हरियाली तीज रे मौके मंदिरां मांय खास झांकियां सजायी ज्यी हैं करौली मांय मदन मोहन मिंदर मांय सावणी तीज रे मौके सिरधालूआं री घणी भीड देखी जावें

अजमेर मांय तीर्थराज पुष्कर मांय सावन झूला महोत्सव री सरुआत व्हीं पाली मांय तीज रे मौके न्यारा-न्यारा धार्मिक आयोजन कर्यो जावें साथै ई लोगां ने तुलसी अर अपराजिता रा पौधा बांटी ज्यां सवाईमाधोपुर मांय विधिपूरण पूजा-अर्चना रे पछे रित मुजब शाही लवाजमा रे साथै तीज माता री सवारी निकाळी ज्यीं सिरौही, बाडमेर समेत न्यारा-न्यारा ज़िला मांय हरियाळी तीज रो तिवारं महिलावां रीत मुजब उमाव रे साथै मनायों राजधानी जयपुर मांय तीज माता री सवारी निकाळी जावे इण ऊं पैला उपमुख्यमंत्री दीया कुमारी जयपुर रा पौड्रिंक पार्क मांय तीज महोत्सव रे तैत काफ़्ट अर फूड मेळा री सरुआत करीं

000

केंद्रीय संस्कृति अर पर्यटन मंत्री गजेन्द्र सिंह शेखावत झालावाड़ रा मनोहरथाना री स्कूल हादसा माथे शोक जतायो है जिला मांय एक सरकारी स्कूल री छत पड़ जावण री घटना माथे गहरो शोक जतायो हैं वणा कह्यो के ई घटना री जांच रे पछे तैय है कार्रवाही तैय करी जायेलां आज जोधपुर मांय खबरनवीसां सागे बतळ करता श्री शेखावत कह्यो के सरकार इण तरह रा हादसा ने ले र सावचेत है अर आवण वाळा बगत मांय हिफ़ाजत हर हाल मांय तैय करी जायेलां वणा कह्यो के राज्य सरकार सगळा सरकारी स्कूलां ने ऑडिट करण रा निर्देश दिया है, जिण ऊं आवण वाळा बगत मांय इण तरह रा हादसा नी व्हें

—हि.स.

000